



Trud i oslonac na Allaha (Meka)

Hatib: dr. Bender ibn Abdulaziz Belile

5. safer 1444. po Hidžri / 2. septembar 2022.

Hvala Allahu, Plemenitom, Svemoćnom, Uzvišenom, Onome Kome je sve potčinjeno. On sve stvara s mjerom, propisuje i olakšava. Sve ide ka onome što je On odredio. Svjedočim da nema boga osim Allaha, jedinog, Koji nema druga, Sebi sličnog i ravnog, i svjedočim da je Muhammed, sallallahu alejhi ve sellem, Njegov rob i poslanik, odabrani i čisti, neka su na njega Allahova milost, spas i blagoslov, i na njegovu porodicu i ashabe, nosioce svakog dobra i plemenitosti, i tabiine i sve one koji ih slijede u dobročinstvu do Sudnjeg dana.

O ljudi, oporučujem sebi i vama bogobožnost. Bojte se Allaha, Allah vam se smilovao, bogobožnost je svjetlo Pravog puta i ključ svih riznica.

Uzvišeni kaže: "O vjernici, bojte se Allaha i budite s onima koji su iskreni!" (Et-Tevba, 119)

O vjernici, dunjaluk je oranica za ahiret, duše i imetak na njemu su nam povjereni na čuvanje i korištenje. Pametan je onaj ko iskoristi svoju priliku i udisaje koji su mu poklonjeni.

Hadis koji ću citirati sveobuhvatan je i koristan Vjerovjesnikov savjet i poruka, obrazac po kojem vjernik postupa i temelj na kojem se zasniva njegovo djelovanje. Slijedeći ga, vjernik će ostvariti svoje ambicije. Muslim bilježi od Ebu Hurejre, radijallahu anhu, da je Vjerovjesnik, sallallahu alejhi ve sellem, rekao: "Trudi se u onome što će ti koristiti, i traži pomoć od Allaha."

Poštovani vjernici, čovjeku je naređeno da se trudi u svemu onome što je korisno za njega na ovom svijetu i u njegovoj vjeri, a to je moguće samo slijeđenjem puteva i uzroka koji tome vode, iskrenim traženjem utočišta kod Vladara i Darovatelja, osloncem na Njega i traženjem pomoći od Njega u postizanju tog cilja. Onaj ko se





ne bude trudio na putu korisnog, izgubio je i propao, i neće postići ništa dobro, ni ponos, ni dunjaluk, ni vjeru.

O vjernici, osnova na kojoj počiva svaka vjerska korist jesu korisno znanje i dobro djelo. Znanje je život za srca, hrana za dušu i s njim je uspjeh na oba svijeta. Najkorisnije i najčasnije znanje jeste znanje o Allahu, Njegovim imenima i svojstvima, naredbama i zabranama, zakonima, propisima i Knjizi, a dobro djelo je obožavanje Allaha i pokoravanje Njemu i Njegovom Poslaniku, sallallahu alejhi ve sellem, izvršavanjem farzova, nafile i pobožnih djela, iskreno, u ime Allaha, i slijedeći u tome Njegovog poslanika Muhammeda, sallallahu alejhi ve sellem, a to je najviši cilj postojanja i stvaranja, kao što Uzvišeni kaže: "Džine i ljude stvorio sam samo zato da Mi se klanjaju" (Ez-Zarijat, 56).

S druge strane, čovjek nikako ne bi smio propustiti i svoju dunjalučku korist, kroz koristan i plodotvoran rad i stjecanje halal opskrbe, kako bi na taj način obezbijedio sebi dostojanstven život, sačuvao obraz i izvršio obavezu vođenja brige o sebi i svojoj porodici. Uzvišeni kaže: "On vam je Zemlju pogodnom učinio, pa hodajte predjelima njezinim i hranite se onim što On daje, Njemu ćete poslije oživljenja odgovarati." (El-Mulk, 15)

Ako se desi da i nakon uloženog truda i davanja vlastitog maksimuma ne ostvari željeni cilj, ne preostaje mu ništa drugo nego da se skloni u "bašču zadovoljstva", tj. da bude zadovoljan onim što je Allah odredio i propisao, tako će povećati svoje vjerovanje i umiriti svoje srce i dušu. Poslanik, sallallahu alejhi ve sellem, rekao je: "Ako ti se nešto desi, nemoj reći: 'Da sam uradio tako i tako, bilo bi tako i tako', nego reci: 'Allah je to odredio i On radi ono što On hoće', jer 'da sam' otvara vrata šejtanovom djelovanju."

Uzvišeni kaže: "Svako se okreće prema svojoj kibli, a vi se potrudite da druge, čineći dobra djela, pretečete! Ma gdje bili, Allah će vas sve sabrati – Allah, zaista, sve može." (El-Bekara, 148)





Bojte se Allaha i znajte da nema ništa bolje za čovjeka, u nastojanju da postigne ono što je korisno za njega, od iskrenosti prema njegovom Gospodaru, tj. da bude iskren u namjeri, volji i djelu. Allah, džellešanuhu, kaže: "A kada je borba već propisana, bolje bi im bilo da su prema Allahu iskreni." (Muhammed, 21)

Iskrenost u namjeri, volji znači odlučnost i nepokolebljivost, a iskrenost u djelu znači maksimalnu posvećenost i nepropuštanje ni najsitnijeg detalja, a to je zaista plemenito značenje koje objedinjuje ispravnost namjere i iskreni oslonac na Allaha. Najiskreniji su oni ljudi čiji su namjera i oslonac na Allaha ispravni.

Donosite salavate i selame na darovanu milost i neizmjernu blagodat, vašeg vjerovjesnika Muhammeda, sina Abdullahovog, to vam je naredba vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!" (El-Ahzab, 56)

